

唐
文
拾
遺

唐文拾遺卷之六十五

榮祿大夫三品頂戴前分巡廣東高廉道加四級臣陸心源輯

闕名 十三

大唐故辰州辰溪縣令張君墓誌

并序

君諱仁字義實南陽西鄂人也粵若祥禽翊景襄城
參問道之遊瑞獸授圖天惺鷹圯橋之冊博通羣籍
對亡書於鼎川識洞幽微辯孽神於璜浦曾祖嵩隋
貝州清河縣令祖生沙州錄事參軍父寬稟性清虛
不希榮祿無爲戰勝賦潘岳之閑居空觀坐忘詠嗣
宗之襟抱遂使揚雄寂寞不謝卿相之尊梁竦清高

耻從州縣之職惟君傳鈎襲慶落印開祥龍節孤標
韻黃鍾於嶰谷鳳條危聳韞白雪於朝陽隱隱詞峯
滔滔學海孔伋成半丘之士黃陂爲尺畎之流爰自
弱齡光茲筮仕解褐任太倉丞秩滿遷辰州辰溪縣
令涵斗大鼎享小鮮於一同舞鶴清琴播弦歌於三
善冰壺湛照水鏡凝清戒三惑於機前銘四知於座
右日者南中逆節徼外虧恩聚餘孽於牂牁照明燧
於包□以君文武兼備奉律龔行師不□時殄茲兇
醜是用授公上護軍特加優錫然則絳灌英雄下車
慙撫字之術蒲密佳政揚麾之樂侮之功兼而有之

實惟君矣鴻漸于陸希參鶴鼎之榮鯨波不留遽兆
□雞之豐以儀鳳二年八月十日春秋六十有二卒
于辰州辰溪縣官第以調露元年十月廿三日葬于
高陽原惟君忠孝稟矢仁義成性芳流桂岳澤潤蘭
泉滑稽臯朔之羣藻續卿雲之筆旣而青蘋座鏘白
玉淪光勒芳徽於立壤將地久兮天長其詞曰

孕靈軒系命氏星弓珠胎產月玉浦暉蟺龍生瑞渥
鳳下猗桐彼美之子實代之雄誕秀公族毓粹卿宗
迺文迺武出孝入忠丹青國化幹蠱門風敦詩復禮
善始令終蒔密清政仁治道豐采縟春□鑒明秋泚

學擯垂帷才優閱市文峯千仞詞瀾萬里繁露蛟申
談立鳳峙南鄉金玉西巖杞梓日薄崦岫波驚地紀
與善無實夢妖斯口風結松郊雲愁隴趾鏤芳徽於
泉戶庶無昧於年祀

石刻

大字

缺四

都督上柱國□□郡開國公孫管真墓

誌

諱真城陽人也顯慶四年八月廿日終於私第春秋
卅有二以調露元年十月十四日收骨於鵝鳴埠禪
師林左起塔

石刻

大唐故大都督王府君夫人祿氏墓誌銘

并序

夫人諱□祿氏嫡于太原王善相之妻也若夫鴻源
迥派與四瀆而方深積構崇基將五岳而齊峻芳苗
盛胄代襲簪裾奕葉光華足可言矣乃祖乃宗蟬聯
繼踵譽標朝野謀略有聞奮氣橫衝英雄烈熾惟公
稟靈清幹夙著勲資少事戎行久陪營陣先沉痼瘵
久奄黃墟作配雙魂早婚祿氏夫人粵以永隆元年
十一月廿七日卒於崇賢之里春秋七十有七卽以
永隆二年二月九日合葬于京城南洪固鄉界韋曲
之禮也孤子□等痛傷脾脞切甚心腸懼陵谷有遷
式旌不朽其詞曰

邈矣華宗崇基峻極嗟乎盛德俄逾晷矣夫人淑姿

奄傾邁電四德久傳六行斯見

石刻

大唐濟度寺故比丘尼法樂法師墓誌銘并序

法師諱法樂俗姓蕭氏蘭陵人也梁武皇帝之五代
孫高祖昭明皇帝曾祖宣皇帝祖孝明皇帝父瑀梁
新安王隨金紫光祿大夫行內史侍郎皇朝中書令
尚書左右僕射特進太子太保上柱國宋國公贈司
空赫奕蟬聯編諸史謀芳猷盛烈可得而詳法師則
太保之長女也勤懇之節及自幼童玄妙之體發於
岐嶷年甫三齡歸誠六度脫履高族落髮祇園旣而

禪室淪精羈象心而有裕法場探秘蘊龍偈而無遺
覺侶攸宗眞門取範而念想云促景落須彌之峯福
應斯甄神升兜率之殿以咸亨三年九月十九日遷
化於蒲州相好之伽藍春秋七十有四摧殯于河東
以永隆二年歲次辛巳三月庚午朔廿三日辛卯歸
窆于雍州明堂縣義川鄉南原禮也恐松垆難固栢
槨終虧式鐫貞石用勒芳規廼爲銘曰

華宗襲慶寶系承仙爰誕柔質歸心福田功登十地
業贊三天神遊法末覺在童先喻筏俄捨慈舟遽捐

幽扉永晦雅譽空傳

石刻

大唐故幽州范陽令楊府君夫人韋氏墓誌銘

夫人諱檀特字毘耶梨京兆杜陵人也神臯華實總
陸海之紛敷巨派靈長控八川之決滂珠光集乘已
聞賢之談金氣衝籙寔重聖人之道貂蟬之美相繼
蘭菊之芬不絕夫人魏太傅鄧襄公之曾孫周內史
京兆尹河南公之孫隨尚衣奉御舒國公之第二女
體少陰之精苞太和之靈佩張箴以白勗擁曹誠以
飛馨神彩嶷然英姿獨茂庭前白雪得飛絮之奇情
琴裏清風知絕絃之不調年甫十五歸于隨尚書左
丞國子祭酒弘農楊汪第五子幽州范陽縣令政本

河魴之美乘龍之慶休祉冠於二門榮耀覃于九族
足不妄動用遵珩佩之聲口無擇言必叶詩書之味
然而四節流邁百齡飄忽如賓之敬不居遠客之遊
斯盡卅有幾卽喪所天惻惻獨處哀哀長疚撫衾幃
而歎息望闔闔而洞開仙草十洲反魂之語徒說庭
梧半死餘生之望幾何粵以永隆二年八月一日終
于永甯里春秋七十有四卽以其月十八日窆於雍
州明堂縣義□鄉禮也恐雙龍有會將申共穴之儀
駟馬長鳴無復佳城之記式鑄金石用播蘭茝其詞

曰

英英之秀灼灼其芳家承鍾鼎德潤珪璋女儀閑淑
母範妍詳地宣六氣天廻二光龍孤斂沒鶴寡琴亡
長終帷縞永絕穹蒼餘生可見奄逐徂光薤音悽囀
松路虛涼勒金聲與玉質固地久而天長石刻

大唐故朝請大夫張君墓誌銘

君諱懿字萬壽清河人也昔玉耀南輝抗炎精於翠
鳳金鉤西慶肇昌緒於靈禽或輔翼攀龍創蟾丸於
漢日或飛榮摠秀捧雀環於晉朝父緒隨任汾州戶
曹參軍質秉圭璋心苞松竹堂堂張也未足標其美
懔懔志也秋口詎得比其威釋褐蒙授朝請大夫觀

國觀光筮仕之期纔邁夢楹夢奠止隅之壘已丁先
薨于返康斯里春秋八十卽以永淳二年癸未二月
己未朔十五日癸酉遷于長安縣隆首鄉之原禮也
五百昌期於斯永謝三千冥契卽此長歸骼瘞幽垆
無復長安之日魂收拱木仍疏京兆之阡嗚呼哀哉
乃爲銘曰

基裘靡墜弁寃聯綿投身迭歎寔乃良賢不求祿位
養性邱園月之變改年隨逝川其一口歆水謝玉質無
全誰知積善不復長返春秋遽往日月旬還令德不

朽歷代流傳

其二

十二硯齋
金石錄

大周朝散大夫上柱國行司府寺東市署令張
府君妻田鴈門縣君墓誌文

錯絡緹紉憑陵縹帙命氏胥庭之表得姓皇軒之初
周漢蔚興曹馬彌盛或封茅土而列子男或剪珪桐
而摠侯伯擊鍾鼎食縱橫於六國之奇動珮鳴珂響
亮於二劉之際衣冠簪紱可略言焉祖德家風則鴈
門縣君也曾祖達隋魏州冠陶縣令懸車捨仕灌園
自樂祖文政唐沛王府大農器局宏壯基宇高深鄉
黨挹其風規縉紳推其道義父什善鄜州三川縣令
廊廟其姿瑚連其質冰潔其清玉潤其白豈止臨淮

朱季吏敬其威蜀郡張堪人歌其惠固可擬儀嵇幹
准的黃陂鳴弦素翟之馴製錦朱鷺之儼其縣君卽
明堂縣人也交川降德龍嶠誕靈端淑爲姿婉柔成
性聰惠明辯廣讀詩書兼善管弦知音絕代無嫉無
忌惟孝惟貞每以雞曙傳音無不晨而問舅落鵝沉
彩會晚拜以參姑內外所以和安大小咸其無怨論
其婦德實曰成家假若張氏修箴懸知少伴曹家設
誠定是無般何煩苦說三從深陳四德者也頃以儀
鳳之歲出歸張氏一經繾綣十有三年當時洛浦親
迎芝田引駕雙輪轉路五馬連珂燭光將扇月爭明

花影共桃蹊競色冀與南山比壽北極齊年何期積
善無微禍殃先至雖越人秘術不救將至之魂秦媛
神方甯駐欲歸之魄痛芳桃之墜驗悲翠柳之凋眉
哀隻影而無依歎孤魂而何託春秋卅有三以天授
二年五月十六日薨於萬年縣平康坊之私第嗚呼
哀哉哀子承家等悲纏扣地殆莫能興痛貫捫天仗
而後起一湔之禮不逾酌飲三年之喪情過泣血其
張君遠哂王生違詩不哭近嗤莊氏越禮盆歌視明
鏡而傷神對空牀而泣簞以其年六月三日遷窆於
城東龍首原長樂鄉王柴村南一里向南與壽春坊

路通也其地北帶涇渭南望秦原四塞之固名簪安
葬自無殃樞必出公侯于時晝輜東送侍嫔排進風
雲隱其郁彩蔽日沉其霞影田歌起頌行路興少爰
之悲楚吹傳聲親戚恨上年之歎恐日月之深遠防
馬臘之荒摧援立斯題紀標刊石其詞曰

家傳烏奕族茂蟬聯安平五里賓客三千朱邸流盼
綵軫鳴絃霜高白雪月上青煙其飛皇啟兆丹鳳來

儀穀城秘府薛縣多奇道義膠榮芳蘭被涯千金白

首一代清規

其二

閨門令淑綺帳流芳昔聞秦晉今是

潘陽聲同琴瑟風度筠簞三星百兩地久天長

其鳳

樓絕響鸞匣沉輝桂花夕落薤露朝晞白楊風斷翠
檣煙歸紅顏掩兮隴黑素質秘兮泉扉一朝寂寞萬

古霏微

其續語堂
八碑錄

唐故僕寺廐牧署令蘭君墓誌銘

公諱師字□□南陽人也若夫逸□橫□□□□□
□表高柳之□森梢萬畝之餘韜映今古昭彰史牒
其皆聯暉□素擢穎朝倫□□□克隆華構者卽
蘭君而已矣祖達周車騎將軍鵷□□□蛟□稱雄
功超光祿之前名冠將軍之右父樊通□□皇朝相
州參軍局量該□詞條鱗茂竟有聞於悲調何以盡

□瓊材公幼負音節孤標雅譽覽□□於早歲拾青
紫於昌辰萬頃洪波溢黃陂而沃日一枝□榦凌郗
□以騰芳風霜之氣凜然岳瀆之靈斯在爰於弱冠
卽預簪纓□□右署丞又轉僕寺廐牧署令或官連
武庫器寶邦基上下挹其□□□□服其忠孝渥川
汗血軼千駟而楊鑾玉塞霜蹄造六閑而服皂屢蒙
□擢□處榮班荷日月之貞暉勵鷹鷂之勁翮□當
享□天秩簡在帝心□元□之遐蹤騁驂騑之逸足
不謂東流淼淼龍門之箭□□西景駸駸烏□之輪
莫□□以永淳元年歲次壬午七月壬辰朔十七日

□□卒於□善里之私第春秋五十有八卽以其年
八月廿四日權殯于邙山之北原禮也惟君廟堂瑚
連鼎鼐鹽梅信義浹於枌榆□用顯於刀筆遂得炤
高風而獨運橫邱壑以孤游頻趨魏闕之前載辟□
宮之地旣而冲霄陸翼搏九萬而無因縱海摧鱗擊
三千而不逮□□笙竽罷奏里閭同悲池臺宛兮未
平窀穸幽兮已閉嗚呼哀哉□□□□崩心聞於厚
地泣血盡於徂暉懼陵谷之□遷紀聲猷於不朽□

詞曰

源流湛淡胄緒蟬聯彌綸素謀暉映青編文武不□

□□□□

其一

奕葉重□忠貞繼踵與朋唯信依仁必

勇並蹈清規□□□□

其二

悠哉慶緒猗歟哲人風儀

獨秀令問惟新材成杞梓□□□□

其三

東川永逝西

光遽落萎哲在茲輔仁奚託□□□□□□□□

其四

邛山舊阜蒿里新塋烟霾拱木日黯佳城九□之上

萬古□名

其五

刻石

大唐故秦州都督府士曹參軍顏君墓誌銘

君諱瑤字瑤河南洛陽人也其先自隨以上載在史

□皇朝鄭州刺史振之孫□州都督府長史思貞之

子幼不好弄甚有名節以門□解褐右千牛尋以□

卷之十五
一
□都督府士曹參軍事天啓顏子人也其亡以景龍
二年二月三日終成□□□卅有二其年四月四
日歸□□□州萬年縣四池坊之北一百步焉禮也
惟後遷換紀其年月銘曰

日夜不息東□水今□同聲歎顏子□琬題芳無極
已刻石

大唐故朝散大夫金州西城縣令息梁君墓誌
公諱嘉運字子安定人也溫潤怡儀恭勤令譽隨尊
巡翟從父亨鮮騁思文塲遊神學圃不意生災鬪蟻
禍及巢雋積善無徵乃纓沉痼至總章三年歲次庚

午三月乙亥朔廿一日乙酉遵疾終于襄陽縣之私第春秋卅四夫人潁川陳氏隆州長史之女也芳儀春芷質茂寒松六行莫僭四德無爽旣而奔駒易往浮箭不留春秋七十有五以長安四年八月十五日卒於安養縣之私第以景龍三年歲次己酉十月甲申朔二日乙酉合葬於襄州安養縣昇平鄉懷德里之原禮也有恐桑海遷變蓮峯化墳乃崇纂芻遂銘其石詞曰

隱隱遙源坦坦平趾矯矯廬陵含章傑起道有虛盈人非金石秋去墳孤春來草積白日徒照元扉詎闢

古誌
石華

唐故魏州昌樂縣令孫君墓誌銘 并序

君諱義普字智周樂安人也受命作周懿親分衛肥
泉自遠瓜瓞攸興儒術著聞卿有聲於霸楚兵法修
列武流稱於強吳興公之藻思文河安國之屬詞史
筆竝播之謠俗傳諸好事曾祖信魏拜露門博士武
闡訓胄槐市說經玉柄增輝璧池逾濬祖進周晉州
長史魏州刺史題輿與壤露冕雄州譽重沂歌愛深
并竹父乾隋鄆城陳倉二縣令絃桐表逸綰墨凝威
卓令恥其移蠅成人媿其冠范君積基三襲騰芳八

桂參玄蘊睿日飛英涯岸自高波瀾莫究以明經
擢第釋褐魏州昌樂縣令導德齊禮今古攸難君顧
水火以銘懷佩韋絃而取誠疲人有恥曠俗知方子
承景至孝有聞高材絹譽情深色養有懷捧檄上元
之歲從宦河東奉以之官獲申溫清而徂春不駐靖
樹難追粵以二年正月二日終于官舍春秋九十有
三夫人李氏言容箸美琴瑟克諧逝先風露奄同泉
壤君雅道絕倫貞風邁俗潁川英傑許以黃中譙國
俊賢方之白起重以虛舟在己仁心拯物妙達玄言
歸心釋教爰自弱冠泊乎華髮飲食薰辛嗜欲咸遣

每行般舟道常誦法華經未終之前若有神應恒詠
薛開府詩云昨望巫山峽流淚滿征衣今赴長安道
含笑逐春歸詞氣悽惋左右傷惻自是數日而終嗟
乎知命不憂託文見意君嘗以爲次房交夢近乎懷
土之心卞壺言留幾乎達人之智故趙文子之擇地
楊王孫之不襲其得意哉承景今任雍州高陵縣尉
聿遵先旨改窆京畿卽以文明元年五月廿一日卜
葬於高陵縣之西南樂安鄉之偶原禮也爾其東界
黃河遙臨晉邑西郊黑水近帶秦垆前望終南得夏
公之寶氣却居渭北枕尙父之璜津是知黃壤四隅

白楸三袵延陵魂魄無所不之正也東西焉能不識
嗟厚窆之難曉歎陰溝之永閼託玄石以披文庶清
徽之不墜其詞曰

邠輦載頌淇竹傳詩悠哉長發邈矣丕基卿傳儒雅
武善兵師家承簪紱業茂基茲於鑠通賢惟材之秀
禮義韜鎖人倫領袖環堵業殫金籟學富從政之道
德音以茂製錦非學勞絲易理潘訓自輕游絃知恥
脫屣城邑披襟田里傲睨風雲徘徊林汜夜壑舟徙
悲泉景昃鬬蟻翻聲巢鷺駛翼萬化斯盡九冥誰測

鹽齏清風泠泠不息

廿二硯齋金石錄

袁氏墓誌

夫人袁氏洛州永昌縣□曾祖君岳梁秘書監太子
□事祖□隨秘書監贈上柱國陽夏縣開□公父大
業唐海州邠山縣□以聖歷二年十月四日□疾終
於乾封縣太平里第以聖歷三年正月十五日權□
於長安縣龍首鄉龍首原

石刻

唐故媯州參軍趙府君墓誌

□諱□□字踐冰中山下曲陽人也祖師隨□居不
仕父潛唐雍州□鄉□長史居約□敏□觀書籍所
與缺七起家左豹韜衛翊衛選□媯州參軍缺四
字三

年五月五日卒於嬀州口舍春秋卅有九以口景雲

二年歲次庚口正月

缺五字

日癸酉追葬口古曲陽城

北五里

缺六字

府君

缺四字

也嗚呼哀哉口爲銘曰

涵

缺四字

咒殊靈珠口吐日口口飛星命之不永魂兮

遂冥千秋萬古松柏青青

常山貞石志

大唐故右衛中郎將兼右金吾將軍同安郡開

國公鄭府君墓誌銘并序

粵若稽古周之德也遂宣王母弟俾侯于鄭然後有
諸侯邦國焉武公父子匡政王室然後有周鄭交質
焉及其河洛歸民號鄆獻邑羔裘所以潤色鴻業鷄

鳴所以國諷詁訓而後門見蛇鬪鼎嘗龜立陽城入
晉員叅添韓俗泯時移姓因國號自茲以降世弗乏
賢北海儒門縉紳仰其高躅關西驛騎冠冕欽其甲
弟公諱元果滎陽開封人其先祖仕也魏名高當代
功冠朝倫時島夷弗庭貂戈未戢廼輟爲東光侯鎮
諸滄海于今褒胄尙守其業祖德通隋平州諸軍事
平州刺史脩以文德服以遠人中外咸甯夷夏弗擾
父仁泰少好奇數預識安危屬隋綱弛網諸侯問鼎
人憂塗炭士弗聊生武帝建旗侍鑾輿而吊罪文皇
受禪翊龍飛以底功天下所以削平社稷由其致固

除靈州都督左武衛將軍右武衛大將軍進爵同安
郡開國公食邑二千戶實封二百戶銀書鐵券山河
帶礪卒於涼州都督諡曰襄公起家文德皇后挽郎
解褐曹王府兵曹趙王府法曹優遊磐石之國馳騁
衣冠之地轉幽州錄事參軍舊周則新平濠縣綱紀
則提目六曹遷伊州長史代州司馬自西徂北撫邊
鄙以全邦無私徇公佐方岳之半刺未逾旬月除尙
乘奉御閑厰藉其襟帶騏驥資其剪拂遷左率府郎
將乘星夜警趨少海之波瀾候月春宮仰搖山之氣
色除右衛親府郎將右衛翊府中郎將爪牙丹禁鈎

陳紫闥以公恪勤奉職重加朝命仍兼右金吾將軍襲爵同安郡公委以倉廩留守京師榮深寵厚勲名將衛霍齊駟道合時來賞契與山河共畢主上深思侍衛追赴洛陽寄以腹心弗遑靡盬加以劬勞鈴禁夙夜匪懈無甯晏寢邁以膏肓從此彌留方隨大漸以大唐垂拱元年六月十九日卒於位春秋六十有三則天大聖皇后痛心哀悼降使臨祭別勅造靈輿給傳郵遞送至京宅公與物無競深恩厚仁嚮風慕義口感行路夫人河南郡君河南元氏後魏景穆皇帝第九子南安王禎七代孫右衛將軍壽之姪右驍

衛郎將偁之女夫人德潤珪瑾質敷蘭蕙含華方鏡
積昭圓流於是占夢維蚺有巢維鵲作配君子以降
榆狄標梅無虧於三實及桃不爽於九華旣下銅雀
之臺還入和鸞之詠雅量溫麗柔姿閑靡彤管符於
稷下清婉合於淹中詩禮抑揚自有椒花之頌箴規
娣姒非無秋菊之銘不以驕奢而遺鼎俎不以富貴
而捐紡績六行克著四德孔脩信可謂儀形邦教丹
青閨訓嗟乎寒泉夕閱風樹晨搖仙草途遐靈香路
邈無復陽臺之雨空餘魏闕之雲春秋五十有三以
大唐永淳元年二月十四日寢疾終於京師龍首里

之弟以開元二年歲次甲寅十二月廿九日與公合
葬於承平里之原禮也長子同安郡開國公行閬州
晉安縣令口嗣等哀纏殯露痛結號天嗚呼哀哉改
卜有典功成身退雄威將壯氣俱銷位達名歸墨綬
與丹青弗朽閔佳城而鬱鬱瞻大樹而亭亭刻石泉
厠列松塋表播芳猷於萬古垂令譽於千秋其銘曰
欽若宗周分天錫地邑封十號孤流千祀其政維何
平王卿士其閒維何號公猜貳號鄒獻邑周鄭交質
詠結緇服符呈丹字互宿恒明茅山弗圯其姓因國
立人稱頴靈婚冠之鏡緇紳之衡名高北海價重西

京儒門卷舌豪族吞聲推棘知讓駟毛見迎其睢鳩

有德和鸞有聞粉澤閨戶丹青闔門玉折知美蘭摧

必芬空悲陟岵徒想幽墳其原隰坎軋煙雲悽慘素

駕迴輪蒼山迥瞰松悲月照禽啼夜感白楊蕭蕭傷

心碎膽其續語堂

四碑錄

唐故榮州長史薛府君夫人河東郡君柳墓誌

銘并序

夫人諱口字口河東人也曾祖帶韋周武藏大夫并

益二州長史大司會開府儀同三司康城縣開國公

諡曰愷祖祚隨司勳主爵水部三司侍郎襲爵康城

縣公孝範皇朝尚書右丞高蔚涵雅婺五州刺史楊
州大都督府長史或立鑒未□兆道治於明君列爵
成功績光於謚典郎官才授譽烈□臺□熊軾唯□
歌芳風俗忠貞永絕簪紱相承國史家謀暄聽華□
視□人十有四歸于薛氏婦則肅於閨閭親儀光於
內外缺實踵前列當規後來既而劒分榮正鳳別嬪
居無益母之男有黃公之女悲夫青春速夫素秋馳
日神理無柱人生有涯春秋七十有六開元六年四
月廿三日終于洛陽縣尊賢里之私第夫人悟法不
常曉身方幼苟靈而有識則萬里非艱□且幽而靡

覺則一正爲阻何必順同穴之信從皎日之言心無
□□攸住是非兩失斯則大道何詩禮之□束乎乃
遺命鑿龕龍門而葬從釋教也有女故朝散大夫□
洛州來庭主簿柳府君夫人攀慕罔極號叩無從虔
奉願命式修厥所以其年八月廿九日自殯遷葬于
龍門西山之巖龕順親命禮也嗚呼春秋因襲陵谷
推遷刻石爲記爰創銘曰

天道恒運人生必□嗟嗟令淑瀟性虛融永齡靡壽
□世歸空北眺丹闕東臨碧嵩生平□兆曠望遐通
夜隴□□秋楊□風掩白日而無□期蒼山而共窮

石刻

唐故□□縣開國男行貝州司兵參軍□□府

君墓誌并序

夫功崇惟志業廣惟勤□□趨班垂衣遺□忠臣奉
國文恩□成前詰克紹彝倫後允傳乎載籍君諱恩
道字勤王京兆涇陽縣人也門承鍾鼎代襲珪璋氏
以國生班隋地進才華挺出文武秀成攷詣聖謨敷
奏天闕薦文儒則清河吐月僉武士則黃石開符列
史攸存遺編可驗者矣曾祖魏輔國驃騎大將軍西
郡公諡曰恭雄風貫代壯氣凌雲長劒倚天揮戈退

日祖隨胡勝二州刺史皇朝梁州愬管諡曰順祿靈
雅濬志節貞明來蘇遠謠惟良是賴位昇九伯名震
二朝父金紫光祿大夫司馭正卿贈原州都督諡曰
安曠代逸才博文多藝僉能見寵位處列卿帝曰汝
諧星光照隴功成身退歸驂華山始辭九列之榮終
贈一藩之寄公思理清遠心鏡冲虛膺五百之賢臣
仕千年之聖主解褐授綿州參軍親連紫禁譴發丹
墀望國門而斷心瞻岱峯而謝魄自貝州司兵參軍
事如意元年四月廿八日殞於私第春秋五十有四
以開元九年十月十日遷祠于幽州宜祿縣之西原

禮也嗚呼哀哉喆人長謝魂兮遙□□默斯隔靈龜
啟兆仙鶴占墳一代英雄玉顏掩晦方告令譽金石
流芳元詞曰

望自西涼乘雲帝鄉來朝北極錫□南陽門傳將相
代襲珪璋猗歟宗祖永□無疆其一師尹赫赫功業巍

巍根深葉茂泉廣龍歸二朝徵辟□命聯輝百城仰
則千里宣威其二代秩公卿雅譽清英天王□詔駟傳

辭京西戎退境北狄銷兵喆人其逝收馬悲鳴其三承

恩紫庭贊治貝城琴前雉雘鏡下鸞□月滿則歎天

道惡盈□逢淪翳終冀康寧其四□河霧斂黃石霞霏

蘭庭掩

缺五

哺鳥群集愁雲

下

石刻

曹氏譙郡君夫人墓誌銘

并序

夫嚴霜瘁草獨歎蘭摧驚鷗拂林偏傷桂折人誰不死嗟在奄賢伊賢者何譙郡君夫人是也夫人曹氏諱明照曾祖繼代金河貴族父兄歸化恭惟玉階惟孝惟忠允文允武夫人柔馨在性婉淑呈姿妙紉組于閨闈潔蘋蘩于沼沚年十有八適左驍衛將軍折府君爲命婦六禮猷備四德凝姿孟氏母儀宗姻酌其訓曹家婦禮里閨捐其風豈謂石破山崩奄從傾逝以開元十一年十月八日終于居德里之私第夫

人春秋不或卽以其年十一月廿三日遷窆于金光坊龍首原之禮也慮樹偃千年人移百代式刊方石乃爲銘曰

天街旣形髦頭有經經緯相汁夫人誕靈如何孤應危露先傾悼逝川之不返敢平生而著銘

石刻

大唐銀青光祿大夫金滿州都督賀蘭軍大使

沙陁公故夫人金城縣君阿史那氏墓誌銘

夫人姓阿史那氏繼往絕可汗步眞之曾孫竭忠事主可漢驃騎大將軍斛瑟羅之孫十姓可汗右威衛大將軍懷道之長女也自冒頓驕天聲雄朔野呼韓

拜闕禮襲京朝殊寵冠於侯王深誠見乎餘羨夫人
天姿淑美雅性幽閑自然貞檢之容暗合蘋蘩之訓
年十有七歸于沙陁氏封金城縣君勤于輔佐外彼
榮滿藩部所以清謐戎馬所以滋大宜其椒衍盈升
保甯榆塞豈謂桂華淪彩已矣蒿歌春秋二十五以
開元七年八月二十四日遘疾終于軍舍沙陁府君
悲興異室感極如賓雖大夜同歸將鼓盆而自遣而
方春搖落詠長簾而纏懷粵以八年三月二十九日
遷祔於長安縣居德鄉龍首原先公特府君之塋禮
也嗚呼生摯榛栗歿奉松楸霜露之祀忽諸蘭菊之

芳無歇嗚呼哀哉乃爲銘曰

李華白兮桃復紅歎零落兮委飄風蘭有秀兮菊有
芳羌淑美兮不可忘閱音容之寂寂侍松檟之蒼蒼

石刻

唐文拾遺卷之六十六

榮祿大夫三品頂戴前分巡廣東高廉道加四級臣陸心源輯

闕名 十四

唐故三十姓可汗貴女賢力毘伽公主雲中郡

夫人阿那氏之墓誌

并序

漠北大國有三十姓可汗愛女建丹賢力毗伽公主
比漢公主焉自入漢封雲中郡夫人父天上得果報
天男突厥聖天骨咄祿默啜大可汗天授奇姿靈降
英德君臨右地九姓畏其神明霸居左袵十二部忻
承美化貴主斯誕天垂織女之星雄渠作配日在牽

牛之野頃屬家國喪亂蕃落分崩委命南奔歸誠北
闕家聲犯法身入宮闈聖渥曲流齒妃嬪之倖女住
天恩載被禮秦晉於家兄家兄卽三十姓天上得毗
伽煞可汗也因承勅澤特許歸親兄右賢王墨特勤
私第兼賜絹帛衣服以充縻用荆枝再合望花萼之
相輝堂棣未花遽風霜之凋墜春秋廿有五以大唐
開元十一年歲次癸亥六月十一日薨于右賢王京
師懷德坊之第以其年十月癸巳朔十日壬寅葬于
長安縣龍首原禮也天漢月消無復粧樓之影星河
婺散空餘錦帳之魂男懷恩兄右賢王手足斯斷雁

行之痛于深膝下長違烏哺之情永絕雖送終之禮
已啟松塋而推改之俗慮爲蕪沒撫貞石以作固鑒
斯文以爲憑庶海變可知田移物□其詞曰

倏辭畫閣永臥荒墳人生至此天道宜論日催薤露
風急□門千秋萬古寂寞孤魂

石刻

大唐女子唐端墓誌銘

女子字端蓋殿中少監唐昭之第三女也母曰王氏
夫其體脩幽閑門傳禮則克柔其性有婉其容春秋
十有六焉不幸天沒以大唐開元十二年六月廿三
日終於京兆靜安里之第以其月廿六日權殯於萬

年縣義善鄉之原悲歟天乎不臧曾靡降福神道何
味忽貽其殃諒何有違遂獲此戾悼以長往終天無
期嗚呼哀哉乃爲銘曰

猗歟慶靈兮錫嘉祉婉而從訓兮善可紀宜其享福
兮極遐祀奈何脩齡兮中道止白楊蕭蕭兮隴路悲
丹旌搖搖兮相送歸相送歸兮永別離天情地義兮
長相違

石刻

大唐故騎都尉智君之銘

并序

君諱元字慶其先隴西苗胄智百王之後曾祖隴齊
南陽郡守祖德板授汾州司馬父並溫儒易志廉讓

兼施守節邱園辭榮不仕君神姿秣遠稟天淑靈帝
施分輝藏光匿耀浮沉閭巷博義寬仁二柄精修時
當用武雄心猛烈召募從征尅敵無遺蒙授騎都尉
豈謂烏災庚日俄飛北斗之魂人夢已年無復南山
之壽遂穆雍家室遜悌鄉閭未旣規模忽離私疾春
秋七十有三開十七年三月十四日卒於私第遂使
愁雲泣烏谿澗吟猿道俗歎其遺蹤內外嗟其舊跡
以開元廿年十一月廿一日葬於夕陽村東北四里
自營禮也東連覆允西眺龍門南瞻象河北臨徐水
哀子懷文號天罔極叩地無追癉切南境悲終陟岵

卽以龍轎去去男申躡屣之悲素旒飛飛女發號咷
之泣其詞曰

青鳥識兆白鶴臨墳梁山歌處遂銘無春

古誌
石華

大唐故冠軍大將軍行右威衛將軍上柱國金

城郡開國公李公墓誌銘

并序

公曰仁德族李氏其先蓋樂浪望族也自堯臣類馬
周史猶龍真裔散於殊方保姓傳於奕代考甲子皇
贈定州別駕天上降成綸之恩地下光題輿之寵公
卽別駕府君之元子也風骨驍奇器用英遠智爲甲
冑義作干戈談王霸則金火生光說甲兵則旗鼓動

色當昔中宗晏駕韋氏亂常將欲毒黎元危宗廟公
於是義形于色憤起于衷發皇明披紫闥奔走電激
左右風起心冠鷹鷂手刃梟鏡人祇再色帝宇廓清
翊一人以御天功存社稷膺四履而列地封固山河
是用拜公雲麾將軍行右屯衛翊府中郎將金城縣
開國子食邑三百戶晝巡徼道環黃屋而竭誠夜拜
殊榮佩紫綬而光寵是用遷公右威衛將軍錫馬承
恩一日三見於天子以爵馭貴十卿同錄於諸侯是
用加公冠軍大將軍進封開國公增食二千戶何居
昊天不愍哲人其萎山岳收神日月奄壽歟以開元廿

一年正月廿日葬於醴泉里之私第春秋六十有一
嗚呼哀哉公履謙謙杖翼翼不軒裳而恃不江海而
閑其生也榮其死也慟匪止隣不相巷不歌寔亦負
展興嗟同盟畢弔特勅贈絹二百匹賻物一百段米
粟一百石供喪事也卽以其年四月十三日葬於高
陽原禮也南面近郊問三龜而一吉東首顧命滅大
樹而小封金玉靡藏誠之智也琴瑟空置奉之仁也
有子二人長曰思敬右驍衛中候次曰思讓右驍衛
司階並七日絕漿式五月而葬孺慕岡極賓拜無容
防地道而變盈紀天性於幽隧銘曰

惟嶽降神冠軍當仁忠孝是佩清白爲鄰曷其榮也
社稷貴臣曷其哀也朝市悲人生可續兮孰不萬春
死可贖兮孰不百身生不可續死不可贖歷考古今
誰免風燭人閱代兮代閱人倏兮忽兮一邱塵舟移
壑兮壑移舟蕭兮索兮九原秋意氣盡兮萬事罷泉
門閉兮九重幽悲夫悲夫空黯黯魂兮魂兮何悠悠
續語堂
碑錄

大唐大安國寺故大德惠隱禪師塔銘

并序

禪師俗姓榮京兆人其家第四女也族望北平曾祖
權隨金紫光祿大夫散騎常侍兵部尙書東阿郡開

國公祖建緒銀青光祿大夫使持節息始洪諸軍事
三州刺史東阿郡開國公叔祖思九黃門侍郎父懷
州夷州綏陽縣令外祖韋氏字孝基皇中書舍人道
遙公之孫也禪師聰識內敏幼挺奇操粵自髫鬣敬
慕道門專志誦經七百餘紙業行精著簡練出家自
削髮染衣安心佛道尋求法要歷奉諸師如說脩行
曾無懈倦捐軀委命不以爲難戒行無虧冰霜比潔
或斷穀服氣宴坐禪忘或鍊臂試心以堅其志動靜
語默恒在定中凡所施爲不輟持誦雖居有漏密契
無爲雅韻孤標高風獨遠嗚呼驚波不息隙影難留

生滅無恒遽隨遷謝以開元二十二年七月十一日
壽終於安國道場春秋七十有六右脇而臥奄然滅
度臨涅盤時遺曰吾緣師僧父母並在龍門可安吾
於彼處與尊者同一山也弟子尼博通三藏才行清
高生事竭仁孝之心禮葬盡精誠之志追痛永遠建
塔茲山縱陵谷有遷庶遺芳不朽乃爲銘曰

至道希夷代罕能窺探秘就妙夫惟我師其一爰自韶

年訖于晚歲精念護攝虔誠不替肅肅戒行明明定

惠淨業滋薰與佛同契其二逝川不駐隙駟難留奄隨

運往萬古千秋嗟永感而無極式彫紀於芳猷其三

石刻

大唐故高士王府君墓誌銘

君諱行淹字通理太原人也回官從地家於河南故
又爲縣人焉爾其仙界上昇踐緱山而逾遠靈源迥
派等淮流而不竭宦達西京齊聲五尹名雄東國高
視八裴歷代英賢詳諸史傳曾祖整齊潞州屯留令
祖勦隨汴州浚儀縣丞父瑋皇朝襄州錄事叅軍事
並冰清玉潤人傑地靈潁川陳氏之聯賢弘農楊家
之奕葉爲邦潞國朞月而政成贊牧襄川隨風而響
應君擢英奇樹晞幹靈根踐詩禮之幽庭入芝蘭之
奧室故得宏材挺拔秀穎孤生逸調不羣清襟獨邁

以乾封二年明經高第授文林郎非其好也解巾從
職雖陪南宮之禮挂冠辭榮遽躡東都之迹烟霞入
賞琴酒據情談老莊而卒歲詠圖書而盡日以垂拱
二年三月廿日寢疾終於景行里之第焉春秋六十
有二惟君素履貞慶黃中元吉果行育德資孝惟忠
出入於仁義之間周旋於名利之外優遊天爵方膺
五百之期寂寞泉扃奄見三千之日嗚呼哀哉以其
年歲次景戌四月庚午朔四日癸酉窆於河南縣平
樂鄉之原禮也有子懷素等樂棘毀兒荼蓼居心痛
遺澤之仍留仰遠期之有日攀松攬栢孺慕何階地

久天長聲芳未已其詞曰

白蜺仙術青鸞政道誠感天地功侔化造靈根仙宮
弈代重規衣冠閎闊人物英奇猗與宰邑或善毗贊
鬱彼襄陽高情燦爛宏材特邁偉量孤凝千尋木聳
萬頃川澄沈研載籍脫缺二字侯東都美遂南澗良游
福善無冀與德何乖泉臺忽掩玉樹長埋石刻

宜祿府折衝都尉□君墓誌

赫赫宗□□天下分族命氏列乎于成公缺連曾

祖威皇祖中大夫禮部侍郎祖立缺散大夫趙郡屢

陶縣令父崇侃□□朝議郎缺戶參軍於是克清門

風乃敷政理備歷中外缺以良家子屬中宗孝和

皇帝有事郊缺爲□□授左羽林軍長史轉京兆

府望苑府別將左清道率府□□候當警夜紫禁環

衛丹墀以事一人方逾一祀無□□調河東郡霍山

府左果毅都尉左金吾衛知隊仗□交郡龍交府彭

原郡天固府加振威副尉新平郡宜祿府左折衝都尉知隊仗如故兼左藏庫使勒驍雄之勇列虎兕之師守金帛之殷將出納之恠公幼而習武長而主兵□默其心堅白其操或善之□矣豈禍之淫矣邁疾彌旬□于咸陽別業然天寶五載九月廿一日享壽五十有五六載十月廿八日葬於長安高陽原禮也
銘曰

吁嗟都尉三居其□天階入侍天府司使福善□□淫□至且小□松栢乃高起襲塏非獨今日之如然皆當萬古之所□

石刻

大唐故西河郡平遙縣尉王府君墓誌

并序

原夫愔於蘭谷者猶聞十步之芳陟於松巖者尙覩
千尋之榦况乃千門□族□□名家堂構挺生不□
不□者矣公諱□字□□河南河內人也太原望族
徙居河內焉曾祖元隨任遂州司馬□□□皇朝□
太子家令贈少府監並以睦□登榮□翰昇貴父_缺
任太子中舍人贈銀青光祿大夫至於承親孝親_五
割股仁_{缺七}之節沐旌表門閭之恩制越古□□降
褒揚道_{缺六}於□代並□編於史牒此可略而言焉
公以積善資靈深仁_{缺六}之性早登儒策之科釋巾任

宣城郡宣城縣主簿江□澆□□□難抑公以清平

作範正直申規□得吏愛厖謠傳芳播譽缺八家之

子富筆之才擢授西河郡平遙縣尉汾州巨邑晉野

雄邦地稱閭井之繁人恣田□之訟公以襟靈若湛

筆翰如流疏江□以□源與奮□而共理自六曹經

□□考在公閭閻無謗讟之聲□□有□揚之美缺八

字觸□懷戀德之情□吏結去思之想故□千里駕

轅轡而已迎勁缺五庭而畢□昆房喜躍廣□善以

同居隣伍歡愉仰仁德而垂蔭方□廣修淨業□繼

先風何期福善無徵殲良奄泊以天寶九載二月九

日邁疾終于河南府河陽縣韓城鄉之本第春秋五

十有六以其年三月十四日安厝于河清縣親仁鄉

祔先祖之塋禮也惟公口德無方嗣徵名以植操口

深仁

缺七字

之儀清高節儉表其口風神

缺四字

體斯乃

自天攸爲嗟

缺五字

縱非乎激浪沉鱗翔空墜羽口口

將駕蒿隧已開

缺十字

之永隔悲舉案之長乖有子三

人

缺四字

郎次

缺五字

爲銘曰

惟彼善門誕生材子稱奇初歲

缺五字

高

缺四字

人口唯

口是言惟仁是居宣城授口汾邑昇榮口察口濫剖

斷

缺八字

仁口口口流美遺愛馳聲反轡邱園安神靜

謚閑缺一字幼筭滿室庶憑積善永固休逸福衍曾元

字缺四荆華□□棣萼旋凋佳城已啟德誌虔標修陵

有變夜壑長昭

孟縣志

唐故定遠將軍守左武衛將軍員外置同正員

上柱國內長入供奉張府君墓誌

并序

公諱毗羅其先清河人也父諱毗羅奕葉承家隱輪
不仕公累襲冲和之氣克遵高上之風芝蘭入室瑾
瑜照廉其事親也色難以養之其行異端智周以成
之由是蕭灑正園恬澹霞月優遊朝有不違大隱之
趣弋釣林泉有光豪士之迹夫然者宜其夫奏天階

拜儀帝坐公家其寵命遂拜定遠將軍守左武衛將軍以天寶十四載八月廿七日薨于金城里之私第春秋七十而以其載十一月十七日葬于承平鄉原之禮也長子咸哀泣血威席沾穴孟常泣感於大風賢陵卦劒於心許乃爲銘曰

府君反葬升成西吉兆地夏明金雞千秋萬歲兮松柏齊魂魄歸兮長不迷

石刻

唐故銀青光祿大夫行內侍員外置同正員上

柱國張公夫人鴈門郡夫人令狐氏墓誌銘

并序

惟天寶十有二載十一月四日夫人卒於京兆府施業里之私第嗚呼時載六十有三夫人之姓裔自乎大原處嬪于室凡廿載矣夫人進對工繡以脩於賓祭□□先祖恭具於膏澤正之以容貍不以悅已怡色事上撫下允穆謙和愛子如生育人無怨夫張公諱元忠任大中大夫賜邑爲鴈門郡君後進銀青光祿大夫遂加號鴈門郡夫人也不意因由運改福謝緣疎夫去天寶九載五月十三日卒於河南府里之第宅次載就葬于京兆府三原縣之分界自阻已後念趣來緣每弘慈悲常思不忘以夫先偶同事幽泉

又歲月無良遂別塋壤歟子未宦莫能再榮嗚呼人
道所悲傷矣以今載十二月四日遷殯於京兆省長
安縣龍首之鄉原也代移世久墳壠摧殘刻石爲銘
媿序夫人之德銘曰

食邑之家捨於珠瑁簪纓之族衣無重綵六行所脩
四德兼載謹慎閨門善音無壞太山南指渭水東邁
歲月蒼蒼記之永代

石刻

唐故將士郎守邠州蟬川府長史焦公墓誌

并序

公諱璿字潤河內廣平人也蓋夏殷之後古者建德
立功因生賜姓宗氏以茲而起枝派自此而起暨夫

溫玉神口蘭

缺四
字

楊威於漢魏之代或宣布於齊梁

之間其後口之口雖百代可知也隨季崩淪天下喪
亂高祖以義旗輪轉元從長安因官平涼遂爲邠土
曾祖仁皇職資陪尉祖貞皇勲官上護軍並積行累
德修辭立誠名播於閭閻之間聲聞於郡邑之內父
庄克勤於家克儉於國不失色於人而人敬之不失
口於人而人信之故得聲聞府縣譽動軍州公幼而
聰敏詩禮以得於趨庭長而強學與義更聞函杖志
學之年旋霑一命之職弱冠之歲望遷五守之官何
啻福慶外移不保南山之壽災纏內豎奄歸東岱之

魂以寶應元年十二月十二日遭疾卒于私家春秋
廿歎苗而之有季痛秀而之無成妻子類崩父母傷
割骨之痛今口遠有期龜筮習吉遂以唐寶應元年
歲次壬寅十二月景午朔廿七日庚辛殯于邠州三
水縣歸義鄉邠邑原禮也父疰悲傷五內哀感四隣
但恐田成碧液水變倉山故勒石留文以旌丹誌云爾
於穆遠衰肇自周秦惟祖惟孝乃武乃文念子
聰敏幼年立身不幸短命福降沉淪嚴父切骨慈母
割恩哀哀戀念泣對孤墳

石刻

唐故畢府君墓誌

并序

公諱遊江平陽王彥之後也世居太原豪族第一英材侗儻智謀深邃謙約節儉廉慎有規於家以孝有曾閔之心事君以忠曉縱橫之略寬而能猛猛而能寬接朋友盡盛德之儀理室家剛柔得中有仁人焉有社稷焉賢妻在室遙鑒於山濤命子理家更崇於幹蠱公周之宗盟也繼世在茲王侯之種遊宦不遂蓬轉於茲降志辱身隱於城市苟得甘脆以奉慈親日居月諸卅餘載公之太夫人以貞元十三年七月六日傾背公禮制不虧大事終竟奉親也生事之以禮死葬之以禮祭之以禮可謂孝道全矣公有子二

人長曰宗茂次曰元清並有令聞皆公之有典有則也將以積善之人保受其福豈爲降年未永罹此禍殃以貞元十九年六月十四日壽終於恒府敬愛坊之私第也時年將耳順深可哀哉里巷不歌鄉鄰歎息則以其年七月一日歸葬於府城西北七里冰河鄉之原也傾城出祖縞素盈途送葬者執紼而行赴弔者隨輅而哭白馬前引顧步而悲鳴啼鳥以臨向風而慘惻恐陵谷屢遷紀茲貞石用招不朽聊述德音詞曰

樂只君子邦家之光日來月往身歿名彰松風切切

野霧蒼蒼昔作人中之寶今歸泉下之鄉

石刻

唐故石府君墓誌銘

并序

府君曰忠政字不邪生于京兆府萬年縣人也邑崇仁里清閑不仕自居其家昏何氏不幸元和二年四月朔葬城西小口村府君壽年八十有二終于長口二年七月十日以其年八月二十二日口葬于小口村長子義後亡亦葬於此後口口口年當家

約缺四
五字

義鄉南姚口口掃灑莊一所遂再啟舉遷厝莊東南口十步已來遂擇吉晨以其年八月九日口祔翁婆及兄義並安于墳闕乃命口口存之不朽銘曰

八月□□風悲切安厝先靈歸墳闕□□孝感理於
天萬代子孫昌不歇

石刻

大唐故成德軍節度下左金吾衛大將軍試殿

中監石府君墓誌銘

并序

府君諱神福字忠良金谷郡人也曾祖試鴻臚少卿
□用祖授左翊府中郎將臣恩父何羅燭試雲麾將
軍蔚州衙前大總管有子四人公則第二子也生於
雄武長在蔚州□歲從師弱冠好武事親唯孝訓弟
唯和五郡欽仁六親談美遇安史作亂飄泊至恒陽
尊父早亡哀榮葬畢及平攻武便得穿楊君主亦知

收於戎伍頻經戰伐累效壇場勇毅前衝殺戮無數
敘功見錄八座親命俯臨悅暢君心遷授大將爲征
馬事重委在腹心兼令勾當右廂草馬使事何天不
祐忽染沈瘵針藥無效去元和八年正月十七日奄
然大謝於野牧時春秋五十有五男乃泣血女孝絕
漿號天叩地親戚悲悼去二月乙酉朔十八缺石邑
縣東北一十里口兆而厝也恐缺石紀芳用傳不朽
其詞曰

英雄將軍武莚超群頻經鬪敵殺戮前奔收功見錄
獨授崇勲紀名貞石不朽于春

常山貞石志

唐京兆季愛子墓志

唐興元初仲春中巳日吾季愛子築役于廬陵殞於西壘之顛吾時自王文昭政命令晦朔康定之始未欲於宅山就瘞於西壘之垠吾卜茲土後當火德五九之間世衰道是浙梁相繼喪亂之時章貢康昌之日復工是壘吾亦復出是邦東平鳩工復使吾愛子之骨得同河伯聽命于水府矣京兆逸翁深浦記天中記

唐故東海徐府君夫人彭城劉氏合祔銘

并序

大和八年歲次甲寅四月廿一日徐府君終於揚州

江陽縣瑞芝里第春秋八十有四越來年乙卯歲
十月廿八日合祔于楊子縣曲江鄉五乍村先歿夫
人故塋禮也府君諱及其先東海郡焉曾祖瓌婚李
氏祖明婚王氏考瓌婚朱氏而生府君婚劉氏而生
五男二女諫暈二子存歿莫知早列前銘禮無再述
其存曰震高上不仕次曰礪殿中省掌御服七色主
衣次詠宣節校尉前守左衛翊壹府翊行常州蘭山
戍主一女適劉氏不幸早廿星霜數秋一女適呂氏
早孀于家三從並絕府君忠孝二備仁信兩全門風
肅清訓子以道夫顯於身者德也顯廿者壽也詵詵

子孫弓裘不墜府君三絕矣古之葬者無銘誌而自
魏時繆襲乃施之嗣子習古之規敢不修撰不捨此
事稱家有無而命余琢他山之石慮虞陵谷直書其
實乃爲銘曰

穀則異室兮死也同穴府君夫人兮于茲永訣刊石
于墓兮克荷前烈嗣子哀哀兮攀號泣血寒郊蒼茫
兮悲風切切萬古千秋兮孤墳弔月石刻